

摘藻堂四庫全書薈要

集部

欽定四庫全書

會要

集部

誠意伯文集卷一



臣董誥詳校

詳校官助教臣謝登雋

欽定四庫全書薈要

誠意伯文集目錄

卷一

覆瓿集一

卷二

覆瓿集二

卷三

覆瓿集三



卷四

覆瓿集四

卷五

覆瓿集五

卷六

覆瓿集六

卷七

覆瓿集七

卷八

覆瓿集八

卷九

覆瓿集九

卷十

覆瓿集拾遺

卷十一

寫情集上

卷十二

寫情集下

卷十三

春秋明經上

卷十四

春秋明經下

卷十五

犁眉公集上

卷十六

犁眉公集下

卷十七

郁離子上

卷十八

郁離子中

卷十九

郁離子下

卷二十

翊運錄

臣等謹案誠意伯文集二十卷明劉基撰基

字伯溫青田人元至順間舉進士以平山寇
功授總管府判辭歸佐明太祖官至御史中
丞以開國勲封誠意伯為胡惟庸毒死追謚
文成事蹟具明史本傳所著凡覆瓿集十卷
寫情集二卷春秋明經二卷犁眉公集二卷

郁離子三卷本各自單行成化間巡按浙江御史戴用等始合為一集而冠以基孫薦等所編翊運錄蓋以中載詔旨制勅故列之卷首然於文集義例有乖今重加釐正退之於後焉基被任明祖參預惟幄竒謀秘計多所裨贊世遂謂為前知凡讖緯堪輿之說一切歸之於基大抵附會不可信惟其詩文沈鬱頓挫自成一家說者謂足與高啓相抗並為

明初弁冕實開三百年風氣之先有可與勲業並垂不朽者又按明史本傳載洪武二十四年三月襲其孫廌伯爵今考翊運錄載廌襲封券誥首云惟洪武二十三年歲次庚午十月己未朔越二十七日乙酉與本傳所紀前後有一年之差翊運錄為廌所自編當必無誤是亦足以資參訂也乾隆四十二年十二月恭校上

總纂官臣紀昀臣陸錫熊臣孫士毅

總校官臣陸費墀

誠意伯文集原序

總序

余弱齡侍家長者談國初翊運諸名臣輒凝聽之憬然
有懷焉長而宦遊四方竊願表揚先哲博綜其遺文頗
喜善本若宋文憲公諸集海內翻刻者幾刻益良劉宋
匹也其文獨刻於枯蒼歲久字訛舛板又漫漶莫或新
之者余奉命按行東浙以瓣香謁公祠下詢遺文僅覩
此編慨而歎曰嗟乎逝將以功業掩文章耶何善本之

寡也屬太守陳君烈萃諸文學重加訂正付於良梓俾
海內同好者共焉序曰高皇帝呼劉伯溫為吾子房蓋
開國首功云然子房自二三籌畫之外其言論風旨不
少概見而公著書之多乃若此何哉說者謂子房授書
黃石舒卷如龍雖神機時出竟善藏其用塞竇閉門不
迫不應為得老氏之術公剛毅慷慨持大節留心經濟
既遇真主期以王道致太平卻小明王御座諸正論義
形於色危行危言高皇帝天威嚴重惟公抗辭不以利

害怵其中振綱紀斥姦慝雖李善長亦忌譖之况胡惟庸乎考公履歷豈孔子所謂以道事君者非耶漢文成侯我明文成公上下相符合特帷幄中諸籌畫耳公守孔氏家法多著書貽後世不若子房之秘密宜也夫其玄機洞鑒神啓於中天之所授以輔開天之聖妙筭所紆乘時鷲發載在國史者既與雲漢同其昭回其諸喻志之說觀物之篇憤世之詞羈旅之幽思薄遊之清况與夫廟堂之所述作士大夫之所應酬又浩浩如江河

嶽嶽如山嶽醺如惠風朗如景星麗如卿雲無意擬古而神情悠邈才氣雄豪體裁音節如庖丁解牛靡不中於自然者公之文章與其功業並傳無斁恢恢乎有餘芳矣余受觀風之寄光昭往訓樹之風聲為世型範何敢讓哉或曰留侯子辟疆方少年能策制諸呂計安劉氏而公仲子璟不忘嗣君卒全大節茲亦兩文成盾嗣之相似者劉氏子孫當世世敬修也因附及之隆慶壬申仲春望日巡按浙江監察御史豫章謝廷

傑序

覆瓿集序

大明太祖高皇帝受天明命奠安華夏二十年間殄偽
漢殲強吳汎掃欃槍廓清寰宇復先王之疆理開萬世
之太平是雖熊羆貔虎之士相與竭股肱奮威武以佐
神功抑亦贊襄廟謨運籌帷幄之中有其人也若括蒼
劉先生伯溫真其人乎先生諱基始以文學上謁於金
陵知我聖祖之克典神天也即委心聽命遂成鼎定功

累官太史令兼太子贊善大夫歷御史中丞遷弘文館
學士卒拜誠意伯蓋匹休伊呂者幾二十年今既九京
不作後進之士景休風仰末照幸先生之文章猶有存
者耳先生之作有郁離子有春秋明經有犁眉覆瓿諸
集壽諸梓者久矣惟覆瓿一編未有序之者其孫刑部
照磨猶間以囑余嗟夫先生之心志於道先生之道著
於文人皆知先生見知當時者以其文而不知太祖高
皇帝知先生於儔人中者以其心人皆知先生之事高

皇帝能盡其心又不知天以先生輔佐聖神肇建鴻圖
者唯在於道然則是編也將以五味之藏飫斯民於飢
頃顛踣者也覆瓿云乎哉先大父弘文館學士復仁公
與先生俱以佐命顯余於照磨為通家子弟故不辭而
序之如此云若夫先生翊戴之績與先公俱有國史在
茲不復述宣德五年冬十月嘉議大夫工部右侍郎前
翰林侍講兼修國史吉水羅汝敬書

寫情集序

寫情集者誠意伯括蒼劉先生六引三調之清唱四上
九成之至音也先生生於元季蚤蘊伊呂之志遭時變
更命世之才沈於下僚浩然之氣阨於不用因著書立
言以俟知者其經濟之大則垂諸郁離子其詩文之盛
則播為覆瓿集風流文彩英餘陽春白雪雅調則發泄
於長短句也或憤其言之不聽或鬱乎志之弗舒感四
時景物托風月情懷皆所以寫其憂世拯民之心故名
之曰寫情集釐為四卷其詞藻絢爛慷慨激烈盎然而

春溫肅然而秋清靡不得其性情之正焉宜其遇知聖
主君臣同心撥亂世反之治以輔成大一統之業垂憲
於萬世也先生當是之時深知天命之有在其蓋世之
姿雄偉之志用天下國家之心得不發為千彙萬狀之
竒而龍翔虎躍也嗚呼千載之前千載之後英邁挺卓
能幾人哉今先生既薨其仲子仲璟與其長孫廌謀以
是編鋟梓垂遠以蕃於先生辱平昔之好命為之序顧
蕃愚陋何敢措詞追慕高風其容讓乎時洪武十三年

歲在庚申春正月上浣永嘉儒學訓導安固紫華山葉
蕃叔昌序

犁眉公集序

犁眉公集者開國功臣誠意伯劉先生既老所著之作
故取此以為號云先生自少穎敏既長於書無所不讀
凡天文地理陰陽卜筮諸子百家之言莫不涉獵元末
登第為瑞之高安縣佐縣者老有稍知天文術數之學
者而其書甚具先生召與之語其人曰公既聰明絕人

而器識宏遠當為一代偉人吾書盡以相付先生遂得
究觀其說而領其要世亂棄官家居洎我太祖高皇帝
渡江先生知為真主也應召輒出佐興大業及其功成
名遂引身而退卒以壽終而其術亦不傳嗚呼公之出
處進退比之子房豈不明白正大偉然大丈夫之所為
哉予嘗觀於先生非惟其勛業冠絕前古而文章亦足
以垂世而莫之與並也是故其仁義積中發而為言可
以方駕古人者則於郁離子見之傷今悼古牢籠百態

可以超邁當世者則於覆瓿集見之若夫優游閑雅托
興微婉而有以盡其自得之趣者則於是編見之其氣
壯故其辭雄渾而敦厚其學博故其辭深宏而奧密其
志忠故其辭感激而切直其行廉故其辭蠲潔而清勁
吁古今之能以勛業文章並顯於當時而垂耀於後世
若先生者幾何人哉先生雖沒而有不沒者存其在此
也歟先生之孫為刑部照磨名豹字士行以才賢篤厚
見稱於人是亦有以見故家文獻之足徵也宣德五年

冬十一月之二日翰林侍讀學士奉訓大夫兼修國史
金陵李時勉書

郁離子序

郁離子者誠意伯劉公在元季時所著之書也公學足以探三才之奧識足以達萬物之情氣足以奪三軍之帥以是自許卓然立於天地之間不知自視與古之豪傑何如也年二十已登進士第有志於尊主庇民當是時其君不以天下繫念慮官不擇人例以常格處之噤

不能有為已而南北繹騷公慨然有澄清之志藩閩方
務治兵辟公叅贊而公銳欲以功業自見累建大議皆
匡時之長策而當國者樂因循而悅苟且抑而不行公
遂棄官去屏居青田山中發憤著書此郁離子之所以
作也郁離者何離為火文明之象用之其大郁郁然為
盛世大明之治故曰郁離子其書總為十卷分為十八
章散為一百九十五條多或千言少或百字其言詳於
正已慎微修紀遠利尚誠量敵審勢用賢治民本乎仁

義道德之懿明乎吉凶禍福之幾審乎古今成敗得失
之跡大槩矯元室之弊有激而言也牢籠萬彙洞釋羣
疑辨博竒詭巧於比喻而不失乎正驟而讀之其鋒凜
然若太阿出匣若不可玩徐而思之其言確然鑿鑿乎
如藥石之必治病斷斷乎如五穀之必療饑而不可無
者也豈若管商之功利申韓之刑名儀秦之捭闔孫吳
之陰謀其說詭於聖人務以智數相高而不自以為非
者哉見是書者皆以公不大用為憾詎知天意有在挈

而昇之維新之朝乎皇上龍興卒以宏謨偉畧輔翼興
運及定行賞疏土分封遂膺五等之爵與元勛大臣丹
書鐵券聯休共美於無窮不其盛哉傳有之曰楚雖有
材晉實用之公之謂也初公著書本有望於天下後世
詎意身親用之雖然公之事業具於書此元之所以亡
也公之書見於事業此皇明之所以興也嗚呼一人之
用舍有關於天下國家之故則是書也豈區區一家言
哉一夔蚤嘗受教於公後謁公金陵官寺出是書以見

教一夔駭所未見愧未能悉其要領今公已薨其子仲
璟懼其散佚以一夔於公有相從之好俾為之序顧一
夔何敢序公之書然得繫名於簡編之末亦為榮幸因
不讓而序之公諱基字伯溫括蒼人若其言之詳官
勛之次則具在國史茲不著洪武十九年冬十有一月
門生杭州府儒學教授天台徐一夔謹序

重刻郁離子序

古之君子學之以開物成務道之以大綸大經必思任

天下之重而不私以善其身故其得君措於用也秩之為禮宣之為樂布之為紀綱法度施之為政刑文明之治洽乎四海流澤被於無窮此奚特假言以自見哉及其後也雖孔子之聖可大有為而猶不免述作以傳道况其下乎然則必假夫文以自見者蓋君子之不得已焉耳矣君子以為學既不獲措諸設施道不行於天下其所抱負經畫可以文明治世者獨得筆之方冊垂示千百世之下知而好者或推以行是亦吾澤所及其志

豈不為可尚矣夫然自秦漢而降能言之士何限非不欲如前所云也率多淫於異端失於偽巧詭而不正駁而不純弗畔夫道固鮮人苟用之以求致治殆猶適燕而南其轅乎闡天地之隱發物理之微究人事之變喻焉而當辨焉而彰簡而嚴博而切反覆以盡乎古今懇到以中乎要會不襲履陳腐而於聖賢之道若合符節無一不可宜於行近世以來未有如郁離子之善者也夫郁郁文也明兩離也郁離者文明之謂也非所以自

號其意謂天下後世若用斯言必可底文明之治耳嗚

呼此寧虛語哉從善少嘗受讀歎其義趣幽賾歧緒浩

穰或引而不發或指近而歸遠懵乎莫測其所以然逮

閱之之久觸類而求然後稍得窺夫涯涘竊譬諸醫師

之籠一藥必治一病玉石草木禽獸之屬皆可以已疾

延年無長物也此其為書所以深得古君子立言之旨

使其得君而措於用其文明之治益天下後世為不薄

詎止度越諸子而已耶是書為誠意伯劉先生所著先

生嘗自任以天下之重於經綸之道開物成務之學素
所畜有曾以其槩翊當今之運輔大明之業昭昭矣存
諸方冊者故御史中丞龍泉章公雖已刊置鄉塾然未
盛行於世先生之子仲璟與其兄之子薦謀重刻以傳
嗟乎茲豈一家得而私之者哉僭為叙其大畧俾貽方
來云爾翰林國史院編修官諸生吳從善序

翊運錄序

天生聖人開基啓運必生命世之臣以為之輔如伊摯

於商呂望於周張良於漢皆翊其君建皇極行王道以致太平以開景運以制禮樂動為世軌也行為世則也黼黻河漢也昭回日星也衣被草木也後世畏之如雷震望之如神明禁其力而不敢肆故其君端拱無為颺行霆驅莫之誰何我朝太祖聖神文武欽明啓運俊德成功統天大孝高皇帝以天縱之聖除元季之亂不數年間遂開六合奄有萬國榮光貫日王氣浮淮躋斯民於春臺之上熙熙皞皞玉燭調泰階平雖曰虓虎熊貔

柱國之臣為之宣力然亦藉明良豪傑與圖治功也方
天造草昧定都建康西有偽漢東有偽吳長艦大艦日
夕相搪擊天下未知所嚮有若開國翊運守正文臣資
善大夫御史中丞兼弘文館學士太子贊善大夫護軍
誠意伯劉先生者沈幾先物獨識真主遂委身而服事
焉太祖敬而信之用其宏謀西平江漢東定吳會天下
大勢固已定矣於是席捲中原羣雄歸命混一四海大
抵皆先生之策也今觀御書詔誥之推獎國計事幾之

商摧詞命往復彌縫參贊千載一過雖伊摯呂望張良
之卓越亦不過於先生矣先生真豪傑之士哉年愈高
智愈明功愈大德愈邵遂分爵土終始榮顯殷周以來
一人而已先生括蒼之青田人予忝為同郡今年守職
翰林其孫鷹等集其御書詔誥行狀事實等文名之曰
翊運錄蓋取誥文開國翊運之語也請予序其首簡予
謂先生之器識事功通於神明文章道德衣被後世溥
天下皆稱道之而先生不自以為至是則先生之所至

世之人未必能知之是錄也企太祖之知人善用賢也
企太祖之聖神文武同符於湯文也見先生之真識也
見先生之宏謀也見先生之勲業也聖明會遇自古為
難乃獨於今見之先生之子中奉大夫江西布政使司
右叅政又能繼武其後結知太祖以庶能見表於制誥
可謂耀於前而光於後矣後之子孫尚亦繼繼承承深
惟祖宗積德創業之不易紹隆先範以副朝廷優禮功
臣之意將見與是錄同垂於千萬載之不泯也永樂二

年甲申夏四月翰林學士奉議大夫兼修國史王景序

欽定四庫全書薈要卷一萬六千五百五十九

集部

誠意伯文集卷一

明 劉基 撰

覆瓿集一

古賦

述志賦

鮮余生之眇眇兮荷后皇之深仁具五氣以成形兮受
明命而為人體乾坤之粹精兮晞日月之景光漱飛泉

之華滋兮浥灑露之醇英製杜蘅以為衣兮藉蔭若之
菲菲佩琳瑯之玲瓏兮帶文藻之歲蕤朝濯髮于蘭池
兮夕偃息乎瓊苑願馳騫以遠遊兮及白日之未晚駕
輕軺之將將兮服蒼虬之駢駢遵大路以周流兮曳虹
蜺之委蛇挾長離而察鵠兮款閭闔之九門豐隆為余
先導兮百靈為余駿奔前燭陰以啟途兮颺凱風使清
埃覲北斗于文昌兮朝玉皇于帝臺食玄圃之丹菓兮
澡天潢之芳津激微焱于桂枝兮輕波起而龍鱗清都

不可以久留兮忽乘雲而遐征浮江湖之浩漾兮陵山
嶽之崢嶸野莽蒼以多榛兮路險隘而紆曲楔揄息然
而攫噬兮蝮蛇蜿蜒以當陸鬱忡忡以怵惕兮適皇皇
以營營雨淫淫而不止兮霧黯黯以晝冥烏鳶號以成
羣兮鳳孤棲而無所楚屈原之獨醒兮衆皆以之為咎
欲振迅以高舉兮無六翮以奮飛將脂韋以從俗兮非
余心之所怡長太息以增歎兮哀時世之異常棄韶夏
而非聽兮登傑侏于中堂笔軒于以和羹兮腌鮑魚而

實沮斷梗楠以給爨兮束荆棘而為柱施曾麗于丘陵
兮怨魴鯉之弗獲虎兕逸于山林兮循戶庭以求索前
蒙叟以指途兮彊揚子使操轆命侏儒令舉鼎兮別都
盧使守閭歲冉冉而將頽兮日曖曖以就昧松栢摧而
根死兮江河化而為澮秣余馬于不周兮整余轡於樊
桐無著龜以決疑兮迷不知余所從搏扶搖以為輿兮
攬列缺以為軒驂青鸞之芟芟兮超烟靄而上浮梁天
津以濟河兮睇紫微之神闕開明怒目而電視兮貌豹

吼而山裂進無人以為之先容兮欲自獻而不敢氣勃
鬱以憑中兮心惻傷以懔懔過少微而歷明堂兮就軒
轅而陳情雷霆砰其隱鱗兮馬辟易而不行訪六符于
泰階兮求民極之所在咎繇不可以作兮競狂直以為
罪凌天街以徑度兮造旬始而瞻西清衆畏讒而卷舌
兮孰能白予之忠誠怡慄其無止兮默悄悄以狐疑要
傳說于箕尾兮命靈龜使占之曰有名必有實兮若形
影之相因相福極出自天兮又何尤乎世之人鼎胡時

而不烹兮旗胡張而弗麾弧不可以射侯兮駟不可以
策而馳衆蠕蠕以朶頤兮若頽波之東趨謂翬翟為弗
章兮愛羸豕之負塗方不可利而規兮白不可涅而黑
悲桂椒之芬芳兮與朝菌而偕落殷比干之剖心兮時
豈不知其為聖人魯仲尼之過化兮焉役役而無所容
其身由彊義而罹殃兮惠直道而被黜子胥忠而殞命
兮伯夷清而不食將登山而迷路兮欲涉水而無航東
西南北安所之兮顧焉擇其所長神真真而不下兮龜

又厭而弗告思糾結而不抽兮意恍惚以震悼忽濫汜
以遐舉兮行遊目於大荒羲和不可扳而留兮恐年歲
之弗將駕廣漠而南征兮叫重華于九疑山岑岑以蔽
天兮江淼淼而不可窺遭吾道夫西陸兮聽鳴鳳于岐
陽慨禾黍之離離兮梧桐摧而不生浮龍門以泝河兮
訪夏后之遺跡川瀆混而不分兮鯨鯢起而人立攬騑
轡而迴驚兮謁陶唐之舊京無衣裳以禦寒兮哀蟋蟀
之悲鳴心悵悵以增傷兮神寥寥其若醉淚洛洛以交

流兮憂湛湛而來會傳說之版築兮無武丁其誰舉夷
吾不逢夫鮑叔兮竟淪沒于囹圄推竭心以服勤兮上
介山而立枯種霸越而滅吳兮終刎頸于屬鏤樂毅升
于金臺兮何遁逃而走趙周條侯之耿介兮卒含怨以
餓餒忠有蔽而不昭兮道有塞而不行名不可彊而立
兮功不可期而成李斯上書以相秦兮空自陷於罪尤
買臣顯而僂辱兮豈如負薪之無憂魚赴餌以中鈎兮
雉慕媒而膺鏑鳳凰翔于丹穴兮又何患乎矰弋返余

旆之旖旎兮還余車之鱗鱗采薇蕨于山阿兮擷芹藻
于水濱列玄泉以瑩心兮坐素石以怡情聆嚶鳴之悅
豫兮翫卉木之敷榮挹清風之泠泠兮照秋月之娟娟
登高丘以詠歌兮聊逍遙以永年

弔諸葛武侯賦

天地閉塞兮聖賢隱淪大旱焦土兮龍無所用其神當
運命之厄窮兮堯舜且猶有極委厥軀以隨化兮亦哲
人之所戚彼狂猾之縱悖兮履羿莽以滔天亂倫汨典

兮流毒為淵夏少康之不作兮時又無湯與武蕨薇不
可以食兮焉眾眾而獨處瞻三顧之款悃兮躋高光之
所為鳳凰非梧桐不棲兮于嗟去此其安歸瞻星芒于
渭濱兮豈皇天之叛渙日昃不可使再中兮指桓靈而
慨嘆昔尼父之不逢兮寓斧鉞于春秋誅姦邪於既死
兮開日月之昧幽般紛紛以攘奪兮世不以此為殃民
彘泯滅猶一髮兮微斯人其孰明覽出師之遺表兮涕
淫淫其如雨悲逝者之不回兮邈英風于萬古

弔祖豫州賦

汙池汀滯兮蛙黽樂之大鵬天遊兮燕雀謂女奚為狐
狸冠裳兮梟獍堂宇支離節䟽兮側身無所嗚呼將軍
兮管葛之倫遭逢庸愚兮有志莫伸委棄九鼎兮烹飪
瓦釜截梁為杙兮束椽為柱偃背泰山兮依倚培塿圭
璋砢砢兮沙礫瓊玖山陵暴骨兮社稷忝離故臣酸嘶
兮行人涕洟卧薪嘗膽兮此維時矣宣光不作兮吁其
悲矣烏號之徹札兮無養由以操之驂騑不逢伯樂兮

與駑駘而並馳系曰龍噓而雲兮夫豈不能自翔鴻鵠
舉翮而千里兮又何必懷此鄉魚遊思故淵兮鳥棲思
故林吾固知將軍之不忍兮惜庸夫之無心日曖曖以
西傾兮時靡靡而就逝雁鴛羣而喋呷兮鸞鳳反為所
制世治亂之有數兮天亦無如之何也匪將軍之不能
兮惜不幸而逢此時也死有重於泰山兮繫生民之休
戚吾獨悲夫將軍兮仰玄穹而太息

弔岳將軍賦

木之顛兮其根必傷人之將死兮俞扁以為不祥嗚呼
將軍夫何為哉天地易位兮江河倒流鳳凰夫殪兮豺
狼冕旒臣不知有其君兮子不知其有父嗚呼將軍兮
獨啣冤而懷苦讎何愛而可親兮忠何辜而可戮父兄
且猶不顧兮何忠良之能育臣竭心以為主兮又何可
以為仇也天之所廢不可植兮亦將軍之尤也山鳥傷弓
而欲殞兮羣啞啞而拊翼猿狖縻于機檻兮爵悲鳴而
不食相伊人之有心兮曾鳥獸之不如忘戴天之大恥

兮安峻宇而高居信讒邪之矯枉兮委九廟于狐狸甘
卑辭以臣妾兮苟殘喘以娛嬉焚舟楫于洪流兮烹驥
留于中路庸夫亦知其至愚兮羗獨迷而弗寤捐薄軀
以報主兮乃忠臣之素心縱狂瞽之弗思兮又何必以
之為禽屈原貞而見逐兮伍子忠而獲戾固將軍之不
辰兮哀中原之蕪穢弔孤墳于湖濱兮見思陵之牛羊
寄遙情于悲歌兮識忘親之不臧

弔台哈布哈元帥賦

世有作忠以致怨兮曾不知其故然懷先生之耿介兮
遭時命之可憐上壅蔽而不昭兮下貪婪而不貞權不
能以自制兮謀不能以獨成進欲陳而無階兮退欲往
而無路忠沉沉而不自白兮心搖搖而不固繫乘黃服鼓
車兮驂蹇驢以曳之冒猛虎于籠檻兮狐狸羣而制之
衆刻木之枉直兮信讒邪之流言倒裳以為衣兮涅素
以為玄前宥寘兮指途兮驅離婁使從之教養由以讐
弧兮繫其肘而引之吁嗟先生兮何逢時之不辰生不

能遂其心兮死又抑而不伸姦何為而可長兮忠何為
而可尤尸比干而獎惡來兮白日為之昧幽重曰嗚呼
哀哉吾安歸乎楔榆升堂兮騶虞以為妖殪鳳凰而斲
麒麟兮糜梁肉以養梟吠狗遭烹兮捕猫蒙醢雄雞晨
鳴兮衆以為罪忠固不求人知兮於先生其何傷國有
忠而不知兮喟皇天之不祥亂曰莽莽崇丘聞無人兮
天高聽遐䟽不得親兮松柏摧折荆棘長兮軒于葦苑
充佩纒兮浮雲虹蜺紛縱橫兮上下阻隔幽不能明兮

嗟吾先生卒罹殃兮姦邪矯枉歸罪愆兮咎繇不作誰
與平兮跖犬噬堯理則然兮麒麟豺狼不同羣兮自古
有之吾又何嗟兮

伐寄生賦 并序

余山居樹羣木嘉果駢植人事錯迕斤斧不修野鳥棲
息糞其上茁異類日夕滋長舊本就悴余覩而悲之乃
募趨捷腰斧鑿升其巔剝條剔根聚其遺而燔之於是
老幹挺立新莢濯如若瘡瘍脫身大姦去國斧鉞之時

用大矣哉作伐寄生賦

天生五材兮資土而成汝獨何為兮附麗以生疣贅蝨
嘬兮枝牽蔓縈瘠人以肥已兮偷生以長榮狀似小人之
竊據兮謂城社之可憑觀其陰不庇物材匪中噐華不
羞于几筵實不諧於五味來烏烏之嘍聒集垂豸以刺
蚝果被之而實萎卉蒙之而本悴壇杏無所容其芬芳甘
棠曷能成其蔽芾亶無庸而有害矧睚眦之可置爾乃
建修竿升木末運斤生風以翦以伐脫纏牽於喬竦落

織甦之騷屑剗鮮膚以除根毀去毒而刮骨於是巨蠹
既夷新莢載蕃迎春而碧葉雲滃望秋而碩果星繁信
知斧鉞之神用寧能裕蠹以生患也耶嗟夫農植嘉穀
惡草是芟物猶如此人何以堪獨不聞夫三桓競爽魯
君如寄田氏厚施姜陳易位大賈入秦栢翳以亡國謀
既售芊化為黃蠹憑木以槁木姦憑國以盜國鬼居育
而人殞梟寄巢而母食堅冰戒乎履霜羸豕防其躅躑
諒前轍之昭昭何人心之自惑故曰非其種者鋤而去

之信斯言之可則

騷

九嘆九首

秋風起兮夕露溥浮雲沉陰兮白日晝寒木葉落兮水
泉乾孤雁鳴兮悽以酸攬余轡兮悵盤桓野蕭條兮行
路難豺狼驕兮狐兔頑蘭蕙死兮荆棘蕃我欲奮飛兮
無羽翰援雅琴兮發哀彈絃斷絕兮涕汎瀾

我髮種種兮颯如其稀我心悵悵兮忽若有遺過吾不

能改兮德吾不能知往者不可悔兮來者不可期進無
益于世兮退將安歸嗚呼已矣兮吾寧不悲

天有田兮不可以耕山有龜兮不可以知咎徵剡蒿以
為梁兮削菌以居楹匠石却走兮工垂拊膺登高望遠
兮觀四瀛水東流兮日西傾般紛紛兮各有營我獨展
轉兮從夜達明

風飄飄兮揚塵野寂寞兮無人舟何為兮山阿車何為
兮水濱北望楚兮東望秦倒江河兮亂星辰天門窈窕

兮重九闔願有言兮遠莫陳虎豹甃甃兮為喜為賔橫
流涕兮瞻蒼旻心馮噫兮不能伸麋有角兮龍有鱗空
山寂寥兮吾誰與鄰

江無舟兮河無梁隰有荆棘兮而無稻梁鷹化鳩兮雀
變隼狸為羆兮龍為蚓睜長顧兮情紆軫九疑高兮禹
穴幽梧桐枯兮鳳不留山木慘慘兮叫鶴鷓鴻鵠飛兮
無所投雲沓沓兮雨悠悠孰懷情兮知此愁

虎厭肉兮騶虞苦飢獺升堂兮麒麟受羈黃髮薦滫兮

章甫承綦箭韶屏棄兮絃筦兜離指玉以為石兮削方
以為規天不可問兮神不可容繫彼之是兮而此之非
有禱在林兮有櫟在馗著龜孔昭兮勿遠余思

今夕何夕兮天宇清步逍遙兮仰觀列星河漢皎兮北
斗橫悲風發兮候蟲鳴林鳥起兮沙鶉驚長夜寥寥兮
何人哭聲愴怳恨兮不忍聽回身入房兮淚沾纓蛟虬
偃蹇兮豺虎獐弧無弦兮車說其衡知不可慮兮誰女
令蹇淹留兮難為情

履霜思衰兮燠則棄之臨河號舟兮濟而置之不網胡
魚兮不弋胡鵠翦薙祀梓兮索灌莽以取水捕猫乳鼠
兮僉以為仁吠狗宵警兮行者怒瞋彈鸞養梟莫知其
咎斲冰以承宮兮曷云能久長太息兮有所思林木動
兮巢鳥悲山有藿兮園有葵心懷君兮君不知

秋天沈澆兮百草黃螭蛄悲吟兮朝榮有芳屣履起兮
獨彷徨心悠悠兮懷故鄉原有粟兮隰有禾桂花紅兮
蘭紫芽涼風動兮松柏馨流潦落兮水泉清蔬可茹兮

秫可酒集鄉里兮會親友坐白石兮蔭蒼筠翫明月兮
思古人魚歸淵兮狐首丘終余生兮安所求

秋日慘淡

秋日慘淡兮秋風其颼白露既下兮繁霜繼之蘖離其
根兮葉脫其枝丰者黝顏兮柔者就萎登高望遠兮涕
泗滂沱松柏稀少兮蒲柳何多露不盈條兮霜晨以晞
歲晏玄冰兮知將奈何

思歸引

山高高兮可以望四荒胡躋爾顛兮而不見我故鄉歲
云莫兮無衣裳車罷馬羸兮僕夫頽僵水有蛟鰐兮陸
有虎狼于嗟柰何兮惟懷永傷

松筠軒歌

彼松之高兮矯吾以其操兮此竹之節兮耿吾以其潔
兮露溥溥兮宵明煙霏霏兮曉清風聲我琴兮鳴鸛我
笙緇胡為兮我衣塵胡為兮我纓颺兮颺兮窈以幽驂
青鸞兮服蒼虬吾與元氣兮升降與雲霞兮綢繆逍遙

兮相羊終吾生兮樂以忘憂

漁父歌

江之水兮悠悠深有鱣鯉兮淺有瀟與儵檜為楫兮松
為舟其釣伊緡兮人誰女尤江之水兮娟娟蕙葭吟風
兮楊柳含烟有鮪在穴兮有魴在淵其釣伊絲兮人誰
女愆江之水兮浪浪泳之汙汙兮浮之洋洋有魚與鰕
兮可釣以網無遐爾思兮人誰女傷

麥舟圖歌

我馬飽粟兮彼食不選秕糠我麥滿舟兮彼無以送其
死亡我忽見兮哀不能忘推以與之兮我心乃康我聞
在昔兮有虞夏商一夫百畝兮家有稻與梁生不餓殍
兮死有藏嗚呼今不得見兮使我心傷

山陰王景回友樵齋辭

稻粱離離兮稂莠驕驕
麒不可以偶狼兮鳳不可以侶
梟求羊無人兮鍾子寂寥
哀風感發兮原野蕭條
四顧彷徨兮憂心且焦
若有人兮在山椒携糧負薪兮嘯歌

以遨黜陟無聞兮寵辱不搖嗚呼吾爾羣兮去無待子
招臨流泉兮倚逍遙無斤我松兮無使栢也凋

柳橋漁唱二首為黃中立作

春風淡淡兮湖水波柳垂橋兮青煙滿莎扣予舷兮發
長歌靡白蘋兮亂駕鵝前有蛟兮後有鼉予往予還兮
吁予柰何

彼湖有波兮此橋有柳我維我舟兮聊以搔我首放歌
逍遙兮哀莫予偶有籜在罾兮有沙在罾逝者滔滔兮

羗不可以久綠蘋兮菲菲落花兮點衣江無津兮海無
涯嗚呼寂寥兮吾誰與歸

獲麟操

有獸維麟兮獵者獲之折肢毀膚兮曾不如鹿與麋嗚
呼哀哉兮爾何生于此時周公已矣兮吾能不悲

在陳操

彼山有楊兮彼隰有柳彼路斯何兮孔棘且阻玄雲杳
冥兮不日以雨重華寂寥兮誰與晤語茫茫九州兮孰

為予所龜蒙無人兮駕予歸處

白雲歌為貞上人作

并序

用貞上人以白雲隱居名其舍蓋取諸唐狄公之言以寓其思親之意括蒼劉基為之歌曰

青山兮翠微白雲兮孤飛
悵遊子兮遠于離不如雲兮
倏往而歸白雲兮容與青山兮
欲雨懷予親兮在雲之下
雲兮雲兮歸予從女

秋山圖歌

秋風起兮蕭蕭望青山兮寂寥水泠泠兮出石葉槭槭
兮辭條氣悽悽兮就寒夜耿耿兮不朝鳳凰兮安之梧
桐兮早凋思美人兮隔江河玄雲冥兮天路遙託宵夢
兮遠徂征款扶桑兮倚消搖眇青離兮不來愴怳悵兮
魂屢飄願乘風兮絕浮雲要洪厓兮訪子喬高無梯兮
深無航鼃鼃陸梁兮虎豹驕歸來兮歸來紫芝有萸兮
黃精有苗

梁孝子廬墓詞并序

梁君天民思其父母而廬于墓將終身焉夫廬墓非古禮也然人子之情有不能已而自我為之君子不非焉或乃狀其景物而詠歌之則悖於禮而非孝子之本心矣故為之作楚語使梁君聞之必愀然悲曰他人有心予忖度之夫子之謂也不其庶乎其詞曰

陟彼岵兮望父陟彼屺兮望母若儀容兮在前恍音聲兮在後陟彼屺兮望母陟彼岵兮望父愴怆兮無聞心摇摇兮愁苦聞空廬兮山之巔朝松有嵐兮暮蘿有

烟其下維地兮其上維天食思寢思兮以日以年嗚呼
魂乎其有知兮矢相從於九泉

送龍門子入仙華山辭并序

龍門先生既辭辟命將去入仙華山為道士而達官有
邀止之者予弱冠嬰疾習懶不能事嘗愛老氏清淨亦
欲作道士未遂聞先生之言則大喜因歌以速其行先
生行吾亦從此往矣他日道成為列仙無相忘也其辭

曰

青山崔嵬兮烟雲杳冥
回溪鬱紆兮巖谷晦明
修篁雜樹兮相蔽虧
洞壑窈窕兮人不知
清猿警夜兮鶴報晨
花開鳥啼兮長如春
隰有芷兮陵有茗
美人不來兮山寂寥
瓊芝兮玉華
丹雘兮翠葩
紫葛兮黃精
礪礪兮髣髴
梁連蜷兮登降
崩崦幽溲
聞礪兮倘晃
譎詭芳蘭桂椒
兮或紅或紫
松風澗泉兮金石
盈耳梧桐萋萋兮
竹實葢葢鳳凰翔
鳴兮五色卉煒望
美人兮翠微空
山寂寥兮遲爾來
歸霓為衣兮霞為裳
飲沆瀣兮食瑤漿

晞正陽兮澡淪陰精神完兮毛髮香握六符躡九靈被
喬雲兮歌洞章御扶搖兮款天門詣北斗兮覬虛皇超
鴻濛兮軼希夷造無始兮逍遙娛召秦女兮吹簫使湘
娥兮彈絲洪崖嘯歌兮王母啟齒萬舞齊進兮襟佩颯
纒長離前驅兮鸞鳥為使蒼龍駢駢兮白虎旁旁雷公
磅礴兮列缺旭旭登明堂兮絕河津上閣道兮攀勾陳
過三危兮繞玄冥出太微兮入西清憇牛渚兮泛靈槎
乘田飈兮以還家美人兮歸來山中兮其樂無涯

王彥中哀辭 并序

王氏二子者故宋給事中信之 闕 世孫也長曰鍾字彥
中次曰錡字彥和是同母一乳而生二子焉及長俱好
學能文詞至正癸巳其長以春秋經魁鄉貢次榜行省
銓授建德路學錄未幾以力學得疾至丁酉四月卒鄉
人咸痛惜之蓋期其成而不意止于斯也其弟悲哭不
能自勝於是元帥石末公聞之為詩以弔且唁而劉基
為文以哀之其辭曰

朝出兮雁行暮歸兮相將聯綵服兮上高堂棣華茂兮
親樂康忽秋霜兮夏零淒風發兮凋紫荆同氣兩身兮
一死一生車復其輪兮嗟何以行窈窕兮惜惜想形容
兮不可尋飲泣兮吞聲恐慈親兮傷心俯重泉兮永隔
掩此哀兮何極盡禮事生兮恪恭子職是謂孝友兮死
者瞑目

古樂府

艾如張

有苑者林衆鳥萃之我欲張羅榛楛翳之既礪我斧又
飭我徒孰是與穢而不剪除爰升于虛以相乃麓有條
我網載秩我目有鳥有鳥五采其章嚶嚶啾啾率彼高
岡張之弗獲憂心且傷寤寐懷思曷云能忘有鳥五采
亦既來止昭其德音以相君子君子豈弟其儀是若艾
而張矣云胡不樂

芳樹

蔚彼芳樹生于蘭池景風晝拂榮泉夜滋燧如其光炫

于朱曦含華吐芬嚶鳴滿枝君子有酒以遨以嬉羽觴
交橫吹竹彈絲相彼草木允惟厥時良辰易徂能不懷
思沛其邁矣其誰女悲

上陵

零雨霏霏亦降于桑愴恨中懷念昔先皇惟昔先皇創
業孔艱寤寐興懷能不永歎精靈安所體魄焉依幽明
隔絕曷已其思堂堂梓宮在彼高岡霜露是萃能不慨
傷禮起由情將情繫物溥斯索矣庶其罔闕郊社既虔

宗廟孔威上陵是申式昭孝思

將進酒

有酒湛湛亦盈于觴酌言進之思心洋洋亦有兄弟在
天一方安得致之樂以徜徉有酒在尊既旨且清何以
酌之有醪其觥豈不欲飲惜無友生愴悵傷懷曷云其
平兄弟之合如塤如篪朋友既比如網如維死喪急難
是責是庇今日有酒如何勿思人亦有言解憂惟酒載
懽載歡亦孔之咎我觴維瓊我竿維玖以樂兄弟以宴

朋友

上之回

上之回六龍矯捷光耀拂鷺鳥輔石闕匝棠梨揚靈旗
縣月支天馬來宛居劉穆上玄釐穰穰坐明堂朝萬方
翁披離玉燭光於億年樂未央

朱鷺

朱鷺來玉山巔頽翁引燁臆延朱鷺來艷流赧飲赤水
食丹砂朱鷺來炎德加威昆明滇燹訛朱鷺來集太液

帝錫祐荒廣斥朱鷺來熒煌煌挾鷓鴣媒鳳凰朱鷺來
皇之輝神笑演無窮期

巫山高

巫山高哉鬱崔嵬下有江漢浮天回深林日月照不到
洞谷闐闐生風雷危峰半出赤道上落日猿狖鳴聲哀
虎牙赤甲鬪雄壯風氣以之而隔閼楚王遺跡安在哉
但見麋鹿跳蒿萊當時忠臣放澤畔乃與靳尚相徘徊
山中妖狐老不死化作婦女蓮花腮潛形譎跡託夢寐

變幻涕泪成瓊瑰神靈震怒不可禱雲霧慘淡昏陽臺
猛風吹雨洗不盡假手秦炬歎飛灰精誠感應各以類
世間妖孽匪自來君不見商王夢中得良弼傅巖之美
今安匹巫山何事近楚宮終古怨恨流無窮

戰城南

朝戰城南門暮戰城北郭殺氣高衝白日昏劍光直射
旄頭落聖人以五服限中外射獵耕織各自安土風胡
為戰鬪不自顧而與鄰國爭長雄高帝定天下遺此平

城憂陛下宵旰不遑食擁旄仗鉞臣不羞登南城望北
土雲茫茫土膻膻蚩尤禡牙雷擊鼓舉長戟揮天狼休
屠日逐渾邪王羶車尾尾連馬羊橐駝載金人照耀紅
日光逍遙而來歸帝鄉歸帝鄉樂熙熙際天所覆罔不
來小臣獻凱未央殿陛下垂拱安無為

君馬黃

君馬黃我馬驪二馬八足爭驅馳回頭顧影雙驕嘶尾
端散作頰虹飛黃馬曜日黃金晶驪馬謂是玄天精眼

前好醜那能明吾聞良驥稱以德不聞矜此驪黃色世
無伯樂識者誰有德無色空自知

思悲翁

弱齡輕日月邁景想神仙顧往諒無及待來徒自憐黃
金棄砂礫劬心鍊丹鉛鑿石不得水沉劍徒窺淵沉光
不我與白髮盈華顛杖策出門去十步九不前歸來對
妻子塵竈午未煙干時乏計策退畊無園田霜蒲怨青
松逝矢恨驚弦已矣復何道吞聲赴黃泉

聖人出

聖人出臨萬方赤若白日登扶桑陰靈韜精星滅芒羣
氛辟易歸大荒曖曖寒谷熙春陽枯根發茁暢幽藏潛
魚躍波谷鳥翔花明草暖青天長青天長聖人壽北斗
軒轅調氣候北辰中居環列宿八風應律九歌奏圓方
交格神靈轅聖人出陽道開億萬年歌康哉

釣竿

斫竹作釣竿抽蠶作釣絲滄洲日暖波漣漪綠蒲茸茸

柳葉垂鈎織餌香魚不知石鱗激水溪毛動玉燕迴翔
竿尾重大魚入饌腮頰紅小魚却放淵沚中更祝小魚
知我意長逝深潭莫貪餌

思美人

雨欲來風蕭蕭披桂枝拂陵苔繁英墮鮮葉飄揚煙埃
靡招搖激房帷發綺綃中髮膚惜寂寥思美人隔青霄
水渺茫山峒冕雲中鳥何脩脩欲寄書天路遙東逝川
不可邀芳蘭花日夜凋掩瑤琴閒玉簫魂眾眾心搖搖

望明月歌且謠聊逍遙永今宵

關山月

關山月明風惻惻萬里黃雲雜沙磧夜深羌笛吹一聲
征人相看淚沾臆古人以綏服奮武衛耕戰守禦不外
求何人倡此戍邊策千載以貽中國憂關山月圓復缺
何忍年年照離別願得馳光照明主莫遣邊人望鄉苦

楚妃歎

江漢揚波六千里上有巫山矗天起錦衾一夕夢行雲

萬戶千門冷如水聞道秦兵下武關君王留連猶未還
山深不見章臺殿汨羅冤淚空潺湲尚憶前王好馳逐
宮中美人不食肉回狂作哲須臾間至今相業歸孫叔
楚宮無復如昔人况有神女如花新悲來恨新還憶故
誰能斷却巫山路

王子喬

王子喬乃是髭王之子皇王之孫深宮洞房不稱意却
駕白鶴尋軒轅虹蜺為旆雲為旛飄然乘風上崑崙王

子喬去何之朝發暘谷暮崦嵫六龍九鳳相追隨穆王
西上不得王母訣胡為元氣獨爾私王子喬去不還后
稷功業委如山猶有九鼎知神姦王城日夕生茆管爾
獨胡為白雲間王子喬空長歎

走馬引

天真真雲濛濛當天白日中貫虹壯士拔劍出門去手
提仇頭擲草中擲草中血漉漉追兵夜至深谷伏精誠
感天天心哀太一乃遣天馬從天來揮霍雷電揚風埃

壯士呼天馬馳橫行白晝吏不敢窺戴天之耻自古有
必報天地亦與相扶持夫差徒能不忘而報越棲於會
稽又縱之始知壯士獨無媿魯莊嵇紹何以為人為

結交行

朋友以義合久要貴不忘結交或匪人騶虞化為狼君
不見市井人盃酒忽相得傾肝瀉膽無所惜一朝需求
不稱意口裏駢蛩心上蚝更聞背語觸疑心墻角車輪
亦生翅君不見耳與餘又不見田與竇當其得意時刻

頸以相就寧知嫌隙反掌成坐令衽席生戈兵古人重
結交晏子真其人伍文執誼羊豕之合死生棄置安足
陳

梁甫吟

誰謂秋月明蔽之不必一尺雲誰謂江水清滄之不必
一斗泥人情旦暮有翻覆平地倏忽成山谿君不見桓
公相仲父豎刁終亂齊秦穆信逢孫遂違百里奚赤符
天子明見萬里外乃以薏苡為文犀停婚仆碑何震怒

青天白日生虹蜺明良際會有如此而况童角不辨粟
與稊外間皇父中豔妻馬角突兀連牝雞以聰為聾狂
作聖顛倒衣裳行疾藜屈原懷沙子胥棄魑魅叫嘯風
淒淒梁甫吟悲以悽岐山竹實日稀少鳳皇憔悴將安
棲

春日行

白日出東陸垂光曜中天大哉至陽德蕩蕩無願偏坐
令慘烈化滋潤頃刻枯槁回鮮妍聖人法天道神化叅

玄微春朝著典禮上下同光暉垂衣向明物自有帝力
皤皤無人知春天和春日麗但願宇宙長如春聖明天
子千萬歲

牆上難為超行

弱水不可以航石林不可以車人生貴守分牆上難為
趨茫茫八極內狹徑交通衢紛紛皆轍迹擾擾論錙銖
焦原詫齊踵龍頷夸探珠片言取卿相盃酒興剪屠機
事一朝露妻子化為魚林間有一士蓬蒿翳窮廬種稻

十數畝種桑八九株有酒且飲之無事即安居孰知五
鼎食聊保百年軀悠悠身後事汲汲復何如

少年行

駿馬狐白裘玉勒黃金羈賓從如浮雲顧盼生光輝朝
驅紫陌塵暮醉青樓姬但見花月好寧知霜雪飛荏苒
世途異淒涼瑤草衰園田皆易主親友盡睽違學書時
既晚躬稼力已微歲晏寒風生倚墻聽隣機逝水不可
挽枯蓬安所依佇立為爾歎感我淚沾衣

獨漉篇

獨漉復獨漉月明江水濁水濁迷龍魚月明復何如楚
國皆濁屈原獨清行吟澤畔哀哉不平上山采茶下山
采藥心在腹中何由可白豺狼在後虎豹在前四顧無
人魂飛上天珠玉委棄不如泥沙躡冠戴履萬古悲嗟

懊懷歌

白鴉養雛時夜夜啼達曙如何羽翼成各自東西去
昨夜霜風起入戶復吹帷兒啼母心酸母愁兒不知

養兒徒養老無兒生煩惱臨老不見兒不如無兒好
食藥苦在口食蓮苦在心苦心無人知苦口淚沾襟
男兒初生時蓬矢桑弧弓老大却思家懊惱無終窮

王昭君

漢庭不賞微功士昭君却向胡中死昭君辭漢入胡中
胡女悲愁漢嬪喜含情欲怨當語誰手彈琵琶淚沾衣
掖庭望幸從此絕巫山有路他生歸殷勤說與上林雁
好在明年再相見漢恩如海長自深妾自生來命如綫

賤妾一身何足惜
可惜當年劉敬策
遂令上策重和親
欲倚紅顏清塞塵
只恐妾身先草露
漢宮無復如花人

塘上行

塘上何所有
有蒲與荷花
蒲花難開
荷易落
使我歎恨
長咨嗟
鴛鴦戲我後
鷓鴣翔我前
四顧不見人
淚下如
流泉
浮萍違淥井
寄身滄江渚
滄江不應竭
是妾命如
許
朝淚灑玉臺
夕淚沾羅衾
采荷得見蓮
中復懷苦心
廣筵列肴蔬
好者即美味
茶蓼有時甘
菘葵有時棄
嚴

風吹秋林蕙蘭化為草於悵今可憎芳菲故嘗好行亦
私自憐坐亦私自憐願為天邊月流影玉堦前

君子有所思

晨上龍首山徘徊望咸京交衢錯萬井甲第連公卿鞍
馬相照曜冠蓋如雲行扈從金宮歸賜酒銀甕盈前庭
列騎騎後苑羅傾城寵極妬心起歡餘驕氣生田竇巧
相奪蕭韓互摧傾快意在一時報復延戈兵范睢掉柔
舌穰侯去彊羸寧知幽燕客接踵夸雄鳴茫茫前車轍

遺跡猶未平胡為不自悟坐使憂患并二疏獨何人千
載垂令名

上山采蘼蕪

上山采蘼蕪山峻路迢遞下山逢故夫悲風生羅袂憶
昔結髮時願得終百年變故不可期中道相棄捐蓮實
生水中石榴生路側未嘗掛齒牙中心豈能識上山采
蘼蕪羅袖生芳菲因君贈新人莫遣秋霜霏落葉辭故
枝不寄別條上白日無回光誰能不惆悵

雙桐生空井 二首

雙桐生空井井空桐葉稀葉稀不自蔽鳳鳥將安歸
雙桐生空井井泥泉不出桐根日夜枯何由伐琴瑟

美女篇

南國有美女粲粲玉雪顏眉目艷華月色映清秋寒粉
黛不敢浣佩服惟幽蘭一朝備選擇得廁金宮班貞心
恥自銜望幸良獨難况蒙衆女妬倩笑誰為歡恒恐芳
桂枝寂寞零露溥素手發瑤琴泠泠奏孤鸞宮商合要

妙遺響風珊珊大音世罕識日暮空盤桓安得託宵亭
集君瑤臺端相思不可極躑躅起長歎

玉階怨

長門燈下淚滴作玉階苔年年傍春雨一上苑牆來

秋思

梧桐生碧砌密葉暗金井驚心昨夜月照見棲禽影

長門怨

白露下玉除風清月如練坐看池上螢飛入昭陽殿

宛轉歌

星稀月白河闌干
飢蟲顛號莎草寒
美人望月歌宛轉
瀟湘水碧蒼梧遠
愁魂一夜不得歸
化作斷雲天際飛

長相思

長相思在沅湘
九疑之山鬱蒼蒼
青天蕩蕩林木暗
落日虎嘯風飛揚
欲往從之水無航
仲尼有德而不用
孟軻竟死於齊梁
松柏摧折桂生蠹
但見荆棘如山長
長相思斷人腸

雉子班

雉子班飛脩脩鳴嚶嚶踉蹌出沒灌莽中袞裳煥爛頰
瞳瞭野人拄翳潛置媒和聲相應無驚猜黃閭一發激
流電錦繡披裂委草萊林棲野啄本無累嗜欲沉溺禍
所胎君不見天池鳳凰食竹實逍遙至和永終日

朗月行

朗月何朧朧照我綺窓中窓中美人不能寐起看玉宇
生秋風秋風飄飄吹木末纖雲卷盡懸明月明月隨風

出海來海水蕩漾龍鱗開寒光噴浸碧落外白浪湧作
金銀臺何處悲風怨羌管誰家舞榭笙簧暖長信宮中
漏水長昭陽殿裏更籌短漏長更短總含情開窓坐視
河漢傾廣寒宮在何處欲往從之渺煙霧青離汗漫不
可期桂華如雪東方曙

大牆上蒿行

牆上蒿方春擢秀何芄芄炎天六月旱無雨枝葉枯死
隨飄風世情翻覆不可擬人生有身莫依倚君不見樊

將軍一朝函首西入秦
又不見劉越石仰天長歌握中
璧三士自殘因二桃子胥終棄吳江濤
世人見機若不蚤何不看取墻上蒿

雞鳴曲

日將出雞先鳴千門萬戶聽雞聲
美人錦帳愁欲曙壯士苦心煎百慮
人間百年能幾日日日雞鳴催日出
一朝過了復一朝白髮蕭蕭此生畢
齊妃播淑德感彼蟲
鳧鳧周宣悟姜后功業光中興亦知
國家共如此莫恠

雞鳴催早起

邯鄲才人嫁為廝養卒婦

邯鄲有才人，豔色如朝霞。嫁作廝養婦，雲鬢埋泥沙。憶昔趙王全盛日，夜夜綺筵張寶瑟。中山美酒盈羽觴，一笑黃金滿千鎰。繁華過眼如轉蓬，故宮禾黍秋芄芴。明珠白璧走函谷，墜簪遺珥空悲風。人生最苦是衰老，白首無歸向誰道。華門夜永月光寒，卧聽鶯駘翫枯草。

出塞

居延風高榆葉空狼烟夜照甘泉宮將軍授鉞虎士怒
蚩尤亘天旗尾紅麒麟前殿催賜酒已覺此身非已有
猛氣遙將日逐吞壯心肯落嫖姚後雁門城外沙如雪
玉帳霜濃鉄衣折長劍須披瀚海雲哀笳莫怨天邊月
北風烈烈刁斗鳴回看北斗南方明驚箭離弦車在坂
不勒燕然終不返

入塞

狐裘蒙茸沙磧裏望見玉關驚且喜關門候吏記曾逢

白髮相看淚如水歸來放馬咸陽原舊遊今有幾人存
斜陽慘淡照籬落閒看鄰翁戲子孫

孤兒行

蓬頭皸足誰家兒滿面塵埃雙淚垂
爺娘棄我不待老骨肉無人但兄嫂
兩身一氣不相知陌路茫茫向誰道
清晨采薪日入歸殘羹冷飯難充飢
欲言問兄兄不顧嫂是他人更奚訴
人生一世為弟兄同根自合同枯榮
爺娘在日曾眷戀願兄回看死人面

病婦行

夫妻結髮期百年何言中路相棄捐
小兒未識死別苦啞啞向人猶索乳
箱中探出黃金珥付與孤兒買饗餌
不辭瞑目歸黃泥泉下常聞兒夜啼
低聲語郎情不了願郎早娶憐兒小

淮南王

淮南王好神仙澄心鍊炁守自然
收拾真一歸中圓化為五色黃金丸
乘風駕景飛上天飛上天逍遙遊八鸞

捧轂龍翼翰虹蜺繽紛夾綵旂上窺九陽下六幽回頭
大笑武皇帝栢梁桂館空清秋

蜀國弦

胡笳拍斷玄冰結湘靈曲終斑竹裂為君更奏蜀國弦
一彈一聲飛上天蜀國周遭五千里峨眉峒峒連玉壘
岷嶓出水作大江地若天浮戒南紀舒為五色朝霞暉
慘為虎豹嘯陰霏翕為千嶂雲雨入嘯為百里雷霆飛
白鹽雪消春水滿谷鳥相呼錦城暖巴姬倚歌漢女和

楊柳壓橋花纂纂銅梁翠氣通青蛉碧雞啼落天上星
山都號風寡孤泣杜鵑嗚咽愁幽冥商悲羽怒聽未了
窮猿三聲巫峽曉瞿塘噴浪翻九淵倒瀉流泉喧木杪
樓頭仲宣羈旅客故鄉渺渺音塵隔含悽更聽蜀國音
不待天明頭盡白

昔昔鹽

楊柳正萋萋門前碧草齊別離如昨日白髮滿春閨飄
花兼淚落行雲逐望迷綠苔凝履跡粉汗浥書題夢到

龍沙北魂銷馬邑西
卷簾雙燕入開鏡一鷺啼腸共吳
江繞眉將楚岫低
攀枝憐並蒂窺沼妬雙棲
躍水寧無劍通天亦有犀
那看明月夜登樓惑馬蹄

東飛伯勞歌

南飛鷓鴣北飛鵠
黃昏鳴雞白日燭
珊瑚石上栽兔絲
鴛鴦獨宿枯桑枝
永夜涼蟾入羅幕
蟬翼不如秋鬢薄
寒塘露蓮千葉紅
可憐零落空隨風

雙燕離

雙燕營巢時雙飛復雙語輕盈柳陌風振迅芹塘雨巢
成近繡幃雙宿更雙飛為蒙主人愛不信有睽違四月
溫風起榴花發紅葢拾蟲還哺雛出入無停背五月教
雛飛繞巢舞烏衣側避蛛絲過斜縈柳線歸六月雛翼
老分飛各相保脉脉傍珠簾依依集蘭橈世事有轉旋
陵谷一朝遷昆明延劫火甲第化歌煙帶睡驚飛出風
沙兩相失死生不得知嬾婉從茲畢回看舊主人粉黛
成灰塵天高雲渺渺海濶波鱗鱗荏苒朝還暮學學向

何處毛凋半夜霜
淚滴三春露
露寒霜又濃
憔悴不成容
同心諒難隔
魂魄終相從

烏棲曲

霜華着樹成秋蕊
樹頭棲烏驚夜起
起向幽閨啼數聲
閨中美人泣到明

吳宮烏啼夜已分
宮中不聞人盡聞
夜深風落茱萸子
沉沉漏斷啼烏死

三洲曲

三洲洲上花柳春
三洲浦裏多商人
酒旗紅袖明江閣
客船只望洲邊泊

八月風吹洲上樹
樓船却向江西去
紅粧送別各沾巾
驚動新來江北人

武溪深行

武陵溪一何深水
有射工射人影
陸有丹蛇長百尋
嗟哉武谿不可臨
溪之水深且濶
鳥不敢飛
龍不敢越
海氣連天
日月昏
茵露著人
肌肉裂
嗚呼丈夫
寧能沙場

百戰死有骨莫塋武谿水

遠如期

遠如期近別尚云可
遠期能不悲憶昔辭君出門去
手種庭前松柏樹
樹今成器人未歸
洞房白髮秋
霏霏高原有梧隰
有櫝待君北却山石下

大堤曲

大堤女兒顏如花
大堤堤上無豪家
東家女作西家婦
夫能棹船女沽酒
春去秋來年復年
復年生歌死哭長相守

君不見襄陽女兒嫁荊州
撞鐘擊鼓烹肥牛
樓船一去無回日
紅淚空隨江水流

明月子

朱閣綺疏瓊作戶
明月照人秋
獨苦桂花吹冷
眠不成
誰家高樓絃管聲
倚樓空望別離處
唯有清光自來去
月圓正好缺復催
人老見月能幾回

短歌行

來日苦短去日苦長
日長不自覺
日短令人傷
君不見

望後月又不見霜中盡清光縱好魄已虧芳心欲動根
先死少年不知老可悲衰老却憶少年時

長安道

長安道送盡芳菲到枯槁人生衰盛苦不常何異長安
道傍草漢家將軍初拜官門前上客車班班一朝勢衰
烟燄歇車輪無聲馬蹄絕明年有詔封冠軍依舊車馬
來如雲

隴頭水

隴頭水征夫淚征夫之淚滴隴頭化為水入秦川流水
流向秦川嗚咽嗚不已何因得天風吹入君王耳

秋宵吟

玄蟬催秋入湘簾芙蓉露浴胭脂淡銅烏吻水添夜長
碧草斂愁歸寒蠶羅帳無人五更雨梧桐驚啼白楊語
春光爛熳不得知霜露淒涼奈何汝

車遥遥

車遥遥馬葐葐不知何人始作車長與人間載離別回

風吹起羅帳塵低頭恨殺作車人

陽春歌

帝車東指淑景昭冶容冉冉生寒條枯根相顧一時起
陽春只在霜雪裏枝頭候禽鳴滑滑暖烟日夜催花發
蜂喧蝶競方及時風雨宿昔成離披人間但見陽春好
未識春陽有枯槁

鳴雁行

嗶嗶鳴雁鳴達旦舉翼相連拂雲漢平原漠漠生野烟

雁飛只向江南天江南十月多未黍一半輸官半供汝
明年二月歸養雛雛成又望江南去

獨不見

暖烟漾春林色紫膩雨摧紅出花蕊蝶飛撩亂燕飛輕
嚶鳴相應俱有情有人抱瑟上高閣坐對粧臺彈別鶴
曲終顧影還徘徊東風自吹羅帳開

梅花落

種梅長江邊歲晚花始發東風為愛桃與李却使孤芳

坐銷歇美人高樓深紫霞捲簾一見長嘆嗟世間有榮
即有悴君不見海中碧樹終無花

折楊柳

去年送君楊柳青暖風晴日花冥冥今日思君瑣窓綠
柳條又綴黃金粟君心却似條上花隨風飄蕩不思家
妾心已作科上槁縱得春光為誰好折取長條寄遠人
人生四十無青春

秋夜月

秋夜月黃金波照人哭
照人歌人歌人哭
月長好月缺
月圓人自老

棗下何纂纂行

棗初作花時纂纂臨路歧
八月棗成實纍纍曜朝日
棗花纂纂蜂蝶翻
棗實纍纍人滿園
巖風蕭瑟枯葉飛
蜂蝶不來人亦稀

白苧詞 二首

鏗華鐘伐靈鼓
青娥彈絲白苧舞
文竿迎風雉振羽
長

袖奮迅若雲舉博山霧合春濛濛玉缸搖火生長虹翠
蕩紅翻如夢中

暖香結暝嬌青春翠釵珠壓光照人鳳簫十二煙霧勻
鴻驚燕嬌波龍鱗玉觴交飛酒如沼門外斜陽在林杪
宮中沉沉天未曉

蛺蝶行

軟芳晞露春鮮妍上有蛺蝶飛翩翩暖風扶暝撲天起
翠重紅輕迷欲死東園無花留不住相隨又過西園去

沉沉斷夢失韓憑却抱霜華怨秋曙

鈞天樂

君不見天穆之山二千仞天帝所以觴百靈三嬪不下
兩龍去九歌九辯歸杳冥我忽乘雲夢輕舉身騎二虹
臂六羽指揮開明闕帝闕環佩泠泠曳風雨明月照我
足倒影搖雲端參差紫鸞笙響震瑤臺寒我欲聽之未
敢前空中接引皆神仙煙揮霧霍不可測翠葩金葉光
相射鯨鐘虎簾鏗鴻濛撼昆崙兮殷崆峒揚天桴兮伐

河鼓咸池波兮析木風遂升泰階朝玉帝側身俯伏當
瓊陛訊曰太極拆裂為乾坤紛紛枝葉皆同根胡為妄
生水火金木土自使激搏相熬煎臣聞三皇前羣物咸
熙熙衆子戴一父皞皞無偏私忽然元氣自蕩瀹變換
白黑分賢癡蚩尤與黃帝從此興戈矛流毒萬萬古爭
奪無時休骨肉自殘賊帝心至仁能不憂帝不答臣心
迷風師咆哮虎豹怒銀漢洶湧天雞啼颺輪撒換三島
過海水盡是青玻璃神奔鬼恠惕驚起遺音淪淪猶在

耳夢耶遊耶不可知但見愁雲漠漠橫九疑

周小史

婉孌周小童冶容敵花紅鮮雲委綠髮明星炯雙瞳采
蘭澧水湄挾彈長陵東擲果關春市卷衣嬌金宮沆眄
溢華彩言咲生芳風常恐秋露零瑤草成衰蓬食桃坐
翻覆倩笑徒為工繁華豈不好不知身所終吾聞濟川
楫乃屬植鰭翁悠悠萬世下德業光無窮

結襪子

昔有信陵君乃在大梁城親為貴介弟位冠諸侯卿傾
家待國士倒屣延豪英詣門謁朱亥虛左上侯羸袖椎
奪兵符救趙蜚英聲河外走蒙騫宗社賴扶傾于今不
可見寂寞傷人情

拔蒲 三首

拔蒲青川渚水淺蒲不長自非排風羽莫羨凌雲翔
拔蒲江水湄終日不盈把嫌殺紫鴛鴦雙戲蒲葉下
拔蒲復拔蒲織作波紋簾無處寄相思秋風露蓮淡

從軍五更轉

一更戍鼓鳴市上斷人聲風吹鴻雁過憶弟復思兄
二更月上城照見兜鍪光側身望山川淚落百千行
三更悲風起樹上烏鵲鳴枕戈不能眠荷戈繞城行
四更城上寒刁斗鳴不歇披衣出戶視太白光如月
五更星斗稀霜葉光爛爛健兒爭先起拂拭寶刀看

前有尊酒行

前有尊酒芳以飴舉杯欲飲且置之丈夫有志可帥氣

胡為受此麩葉欺禹惡旨酒玄德上達桀作酒池而南
巢是蔡商辛惡來以白日為夜糟丘肉林相枕藉瑤臺
條忽成灰塵流毒猶且遷殷民夫差醜而納施楚國酣
而放屈姑蘓臺上麋鹿遊郢宮中狐兔出灌夫罵坐
禍延魏其竹林稱賢神州蕝藜亡家破國有如此酒有
何好而嗜之前有尊酒釀以清酌之白日成晦冥眼花
耳熱亂言語元氣耗斃肝膽傾乃知酒是喪身物衛武
之戒所以垂休聲

公無渡河

丈夫不愛死成仁心所安殞身苟無故哀哉徒自殘水
能殺人人共知公獨茫然狂以癡黃河渺渺無津涯乃
欲絕流而渡之公也溺死人誰悲世路如何險惡實多
平地倏忽滔天風波利溼欲餌孰知其佗不見不聞縱
橫網羅固不必如公之癡可堪以魚中之鉞亦不必如
公之狂可禽以伏甲之觴眼前言咲百媚出寧知兵刃
羅心腸公無渡河河無津筓篴一曲愁殺人

隔谷歌

戰鼓咽悲風，弓折不可把。
弟兄隔谷不相聞，咫尺人間
與泉下。丈夫誓許國，殺身非所憐。
兩心本一氣，何能坐相捐。
登埤四顧望，慷慨肝膽裂。
不見救兵來，但見繞城鐵。
甲光如雪飛，禽在羅罔尚。
或念其飢身，為高官馬食。
粟忍見手足居重圍，相彼鴻與雁，亦各顧匹儔。
挽弓射一猿，羣猿拔箭聲啾啾。
鳥獸且有情，人心獨何尤。
嗚呼田家紫荊雖微木，不忍聽君歌隔谷。

步虛詞 五首

太微啟靈宇紫殿含祥風
圓光照無外梵炁來冲融
仙人魚鱗次羽葆朝當中
離羅鬱蕭臺縹緲浮太蒙
泰階平六符文昌位三公
北斗運元化軒轅成歲功
稽首玉陛下逍遙樂無窮

鬱華開赤殿結鄰炫黃文
歲蕤爛霄漢照曜下土墳
東華蹕嚴駕西崦泮昏氛
神行肅疊疊象化陶醺醺
景風調塊扎玉燭煥烟煜
冥茫密笏間歛忽幽朗
分萬靈仰

無私九真告成勳

重陽絳寶闕衆星拱高垣寥寥太虛庭巍巍無極尊白
虎伏右駢青龍承左轅玄武後躩踞長離前騰騫黃靈
正常居萬有歸一元希微眇稊粟浩蕩彌乾坤高卑各
奠位神化無窮源

步虛歸太一精心覬樞庭浮浮回極運湛湛規中清五
神謹訶衛六位肅救寧東溟升陽曜西海生陰靈炎光
嬉玄室湧醴液朱陵駸駸麤穢除綿綿淳粹凝妙用無

邊方攝身遊帝青

焚香禮玄梵肅駕朝紫宸游雲結華蓋鮮颺翼飛輪披
煙上閣道佩月攀鉤陳服食丹霞漿嗽嚥甘露津琅琅
歌洞章寂感虛皇嘖飄飄廣莫風舒嘯青林春沆瀣六
合外永與無始隣

氣出唱

今日不樂振策遠遊東上泰山魏何脩脩道逢仙人要
我同仇蒸霞為糧烹玉為羞玄英素蕤光華蔓沅日觀

菡萏葩華九州令我從之身輕若浮道以五鸞翼以兩
虬朝翔玄圃夕止蓬丘謁見王母雲眉月眸青娥三千
或舞或謳風吹琅玕聲如鳴球雜花並開莫知春秋洪
厓先生勸我此留自揣凡骨非仙者儔七情交煎一觸
百抽又病驚僻無藥可瘳崇崇清宮蕩無涯陬列仙如
沙不少一漚王母笑聽拜謝扣頭歸來山林曷標曷鈞
熙熙泰和長樂無憂

班婕妤

昭陽秋清月如練
笙歌嘈嘈夜開宴
長信宮中辭輦人
獨倚西風詠紈扇
傾城自古有褒姒
紅顏失寵何須怨
泠泠玉漏掩重門
一點金釭照書卷

神絃曲

紫桂飄香九萬里
三山地色如凝水
水妃骨冷不能眠
金簪素指敲冰絃
泠泠玉泉滴貝闕
澗壑瑟瑟泣幽碧
青瞳小髻歌繁霜
霜飛風起江低昂
瞳矐紫燄出海樹
天清月落空相望

短歌行

涼風西來天氣清雲飛木落山崢嶸髮膚剝削稜骨生
鮮芳於悒成枯莖百蟲哀號百竅鳴凡有形色皆不平
成之孔艱壞厥輕壽人含愁起夜行列星滿天河漢橫
繁思攢心劇五兵天高何由達其情歸來託夢通精誠

長歌行

秋夜夜長月照軒夢見天神與我言曜靈循環周四垣
四時迭代成寒溫枯榮生殺相為根我於萬物何怨恩

生丁其時命所存六淫洶湧無鑿閤由其弗約離其魂
春葩敷披夏實繁外美中瘁誰能捫風霜涸寒肅不騫
納華収真歸本元掃滌浮穢夫何寃我今與女開女昏
生生殺殺無窮源歟女旨蓄守女門扶桑赫赫升朝暎

燕歌行

霜飛動地燕草凋沙飛石走天蕭條江河倒影陵谷搖
白日慘淡晝為宵美人迢迢隔雲霄青冥無梯海無橋
魚枯雁死星芒消沉沉思君不自憫愁如驚風鼓春潮

歲云暮矣山寂寥梧桐葉落空乾條崑崙層城阻且遼
蒼梧九疑煙霧遙瓊田瑤草芟蕩蕘江離澤蘭成艾蕭
登高望遠肝肺焦安得羽翼搏長飈

江南弄 七首

江南細水綉綺波江南綵女雛鳳歌凝嘖引睇紆青蛾
紆青娥舒窈窕網軒繡戶鎖嬌春不放杜鵑來木杪
雄龍呼鷗江底鳴山搖谷殷江波驚餘音不斷隨風征
隨風征入湘竹截玉鑽星吹向天楚江六月無炎燠

湖波澄明日色鮮
畫鷁相隨出采蓮
嬌紅曼綠鬪春妍
鬪春妍倚徘徊
今朝花盡且歸去
明日更有新花開
河曲懸匏渭濱竹
碧鮮削出藍田玉
輕翎參差飛羽謾
飛羽謾幽簧含丹櫻
瑤筍調清吹月明
紫鳳來毵毵
采菱女子木蘭船
翠裾紅袖青玉鈿
搖光蕩影惜嬋娟
惜嬋娟愁夕暉
拔蒲歌斷鯉魚入
歸去芰荷香滿衣
江草萋萋春渺渺
江皋出遊多窈窕
輕霞衣裳碧雲嫋
碧雲嫋紅日斜
鴛鴦飛過綠渚去
東風吹落菖蒲花

五山宮堯巫峽長
瑤姬出舞朝雲翔
翠葩嫫嫫金支光
金支光丹葉艷寶雞為使鳳為驂
去雨來風樂無極

步出夏門行

步出夏門遥望滄海九河茫茫碣石安在魚龍澆滯日
月掩藹三山何所弱水浼浼羲和曷往鼇極孰宰發鳩
之羽其心不改安期不死桃實可待悠哉沛乎歌以永
慨

丹霞蔽日行

彤霞何煌煌蔽此白日色炎埃被九野照灼后土赤朱
陵開火府燿爛相蕩射山蒸絳紅氣川瀉丹砂液穹玄
變光曜衆草相烜赫迥迷河林箝高奪昆侖碧鬱華不
能神跋烏已化魄女媧在青天歲莫還鍊石

烏生八九子

樹上烏一生八九子相呼啞啞聒人耳何不學啣泥燕
和鳴集桃李又不學鷹與隼奮翅高飛碧雲裏胡為巢
此庭樹間啄腐吞腥饕吻觜少年挾彈如流星禍機潛

發不見形翅翎摧折身首磔螻螳傷殘誰女惜

猛虎行

君不見昔者牛哀病七日化作猛虎形躩踞衣裳佩帶
換毛尾棄置衽席眠茅茨怒牙出吻目閃電頃刻不識
妻與兒昨日燈前相笑語豈意今朝化為虎嗚呼世上
茫茫化虎人祇應化心不化身

行路難二首

君不見水上澌往來倏忽隨波移又不見花上蜂東枝

飄落尋西枝世人食葵不食蕪莫倚結交心匪石君不見避席武安人即是當年竇家客

君不見白日光不照幽草心又不見石上雲膚寸遂成陰世間會合良難得况有巧言能燦金伏波藁葬魏碑仆當時豈是非知音智謀啟疑忠逆耳平地反掌生崎嶇行路難愁最深

野田黃雀行

野田雀嘴啄啄朝食山下禾暮食山上粟千百為羣叢

薄裏忽然驚飛若蜂起飛飛却落稻田中衆口齊啄稻
為空農夫力田望秋至沐雨梳風盡勞瘁王租未了私
債多况復爾輩頻經過野田雀鷹隼高翔不汝擊農夫
田父愁何極

何當行

念離莫悲歌悲歌慘於哭思鄉莫望遠望遠傷心目九
疑迢迢隔湘川空山落日啼杜鵑梧桐摧折鳳凰去蛟
蜃出沒波滔天令我四顧心茫然淚如懸崖瀉流泉樊

桐有路到玄圃何當飛墮王母前

射虎詞

長戈如林夾弓弩言向深山射猛虎
猱兒蒙鶻走如風
所過犬羊皆為空紛紛散入人家宿
丁男上山婦女哭
前行聞虎心先畏一虎當頭萬夫棄
折弓墜劍委如土
却向人前作威武

苦哉行

雞不可使守門狗不可使司晨
驅車梁弱水日暮空悲

辛我欲乘風謁閻闔虹蜺彌天雲霧合九關虎豹森駭
人長跪陳辭闕不答錯石作璵璠鬼神驚見欺截梁為
樽櫨般垂拊膺淚交頤衝風結玄冰道惡不可履巫咸
上天去澤凍神蒼死我欲竟此曲此曲多苦聲鴻雁向
天北因之寄遐情

起夜來

微月就沒銀河爛城烏啞啞夜將半憂愁不寐攬衣起
仰看明星坐待旦威弧歷落連天狼兩旗欲動風不揚

槐根王侯夢未覺豈知雞聲堪斷腸

長相思

長相思妾在天南君在北紅顏未必無人知葑菲不羨
君玉食相思迢迢隔天河長夜不眠愁奈何欲憑魂夢
到君所君門九重虎豹多長相思向誰道涼風日夕吹
桂枝可惜馨香暗中老

無愁果有愁曲

君不見陳家天子春茫茫後庭玉樹凝冷光樓船江上


走龍陣宮中只報平安信
酒波灩灩蒸粉香暖翠烘烟
妬嬌鬢無愁老矣貂鼠裘
降旗搖動臺城秋生綃束縛
檻車去始信人間果有愁

妾安所居

憶昔嫁君時紅顏豔春華
今與君別離明珠化為沙
女兒嫁夫願偕老何異青
菘纏蔓草一枝一葉俱有心
生死長當兩縈抱誰言妾
心君不知芳蘭委棄同蒺
藜妾欲有言君不見君車
遥遥妾空戀君家大宅荒
路隅可

憐棄妾安所居

誠意伯文集卷一



總校官候補中書臣吳紹深

校對官中書臣張培

謄錄監生臣魏鎔